

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件广告宣传页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



近代中國史料叢刊續編第十三輯
沈雲龍主編

清代毘陵名人小傳稿

張維驥纂

文海出版社
有限公司印行

近代中國史料叢刊續編 第十三輯

目錄

清代毘陵名人小傳稿	張維驥纂
愚齋存稿 卷一至卷二十五 奏疏·電奏·電報	盛宣懷撰
愚齋存稿 卷二十六至卷五十 電報	盛宣懷撰
愚齋存稿 卷五十一至卷七十五 電報	盛宣懷撰
愚齋存稿 卷七十六至卷一百 電報·補遺·東游日記	盛宣懷撰
愚齋未刊信稿 光緒二十三年至民國四年 附：家書	盛宣懷撰
庚子都門紀事詩	延清撰
張謇傳記	劉垣著
記章太炎先生（附太炎文錄續編）	沈延國著
吳稚暉先生紀念集	楊愷齡編

V1233/02/2

清代毗陵名人小傳稿卷十一

邑後學張惟驥季易纂

閨秀

吳永汝

永汝字小法常熟人武進鄒祇謨聘妾七歲善琴箏十歲工染翰樂府歌詞一見即能詮識有霍王小女之目其母攜之毗陵年十二而字於鄒後為雀角所阻其訣別詞有云質如蒲柳敢偶姬姜年豈桑榆忍甘駟膾念一生其已矣將九死以何之為詞楚楚可誦邪有惜分飛四十四闋并製序以悼之

周姍姍

姍姍字小姍武進黃永聘室善詞歸永後半載而夭

束蘅

蘅字佩君武進人烏程沈宗圻妾工詞

謝瑛

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



www.docsriver.com 商家 本本书店
内容不排斥 转载、转发、转卖 行为
但请勿去除文件宣传广告页面

若发现去宣传页面转卖行为，后续广告将以上浮于页面形式添加

www.docsriver.com 定制及广告服务 小飞鱼
更多**广告合作及防失联联系方式**在电脑端打开链接
<http://www.docsriver.com/shop.php?id=3665>



瑛字玉英武進人同邑徐可先室博學工詩

吳瑗

瑗字文青無錫人武進薛某室善繪牡丹鸚鵡日以易米爲舉案之供因冤獄牽累破家寄寓半塘詞藻自給

習忍

習忍武進人不知誰氏女工寫生師憚南田娟娟雅潔枝幹花葉均有意致非貌似也

吳永和

永和字文璧武進人董玉蒼室以節聞工詩詠虞姬云惜哉太史公不紀美人死沈德潛謂虞兮之死史筆無暇及此然一經拈出具見心思所著茗窗集著語清新

半園女孫

半園女孫姓唐氏不著名號武進人善繪事花卉禽魚秀逸有致以大父宇昭家有半園題款印章並署半園女孫

憚 冰

冰字清于又字浩如武進人父鍾蔭南田先生族曾孫也冰寫生芋眠蘊藉用粉精絕迎日花朵俱有光彩適同縣毛鴻調不應舉築小樓居之吟詩作畫老焉

馬 湘

湘字靜香崑山人武進某相國侍姬工蘭竹善歌舞爲海寇所殺

張瓊娘

瓊娘武進人同邑段玉函室夫婦以詩詞相唱和家甚貧瓊娘勤女紅夜常不眠坐幼兒於側親授之書玉函遊數月不返歸則攜空囊瓊娘笑相慰未嘗言有無也庭宇淺隘避邑徙鄉玉函出則終日扃戶稚子獨嬉戲庭下拾花弄草啼笑聲罕聞自題其軒曰憐影著憐影軒詩集慰玉函曰君遊幸無念我但見人詩詞及自題詠必寫之歸探囊得佳句勝黃金也玉函自橫山喚渡過樊川聞姑惡聲入破庵無僧累甌坐佛龕前俯首枕雙膝聽之天且晚題詩龕壁而去詩云樊川林外一溪烟姑惡新聲最可憐客裏任他春月

去陰晴休問落花天瓊娘和云池塘春草淡生烟瘦影如君雨可憐殘日半
輪回望處粉紅雲色玉藍天

唐祖英 崔允嫻

祖英字素質武進人執玉胞妹適崔岱齊工詩女崔允嫻適執玉子少游亦
工詩

湯朝

朝字蕉雲武進人吾鄉呂氏侍兒也能詩時烏程沈无咎客武進无咎少工
詩朝見所為夢花集好之因題四律主人以示无咎无咎未娶因聘為妻於
是朝詩益進以所酬唱合刻之曰笙磬同音集行世

錢孟鈿

孟鈿字浣青一字篠如號冠之武進人錢文敏公維城女永濟崔龍見室文
敏以詩畫名孟鈿詩法多經口授與龍見唱隨風雅洪稚存序其詩謂以江
上峰青之篇配楓落吳江之詠誠不誣也又熟史事與叔父維喬舉某人某
事在某某傳以相賭勝維喬輒不能及有子三人都擅文譽維喬題其詞云

郎種甘棠兒視草脩來福命勝梅花爲世豔美

△莊玉嘉

玉嘉字笠仙武進人湯雄業妻祖學愈開州知州父蓉纓大學生玉嘉嗜書史善女紅恭謹和婉年二十二歸雄業侍兩世翁姑俱能得歡心處娣姒間油然無閒言雄業初官廣西橫州以治行累遷至廣西布政使玉嘉間歲代雄業歸省內外區處悉當喜爲詩兼工小令清新之中有豪雋之氣著有聯香集乾隆五十八年歿年五十有七

王采薇

采薇字玉瑛武進人同邑孫星衍室姿質清弱貌端麗性柔婉耽文史不釋手尤好吟詠每明窗淨几讀書臨帖煮茗供花脩然物外喜讀漢晉書工小楷絕似虞永興家法時繙道家書志神仙其父切戒之則止而夙根靈慧時有出塵之想年十九贅星衍於家乃邀星衍填詞並約圍棋星衍謝未學後遂爲小詞而卒不能對弈好絮除几席星衍每陳書滿案而出比入室則已爲整齊之得許氏說文乃與星衍約日識數十字久之遂通小學論說史事

俱有神識既得疾終夕嗽不止自疑將不起為詩詞多淒楚音年二十四卒

錢芬

芬字左才武進人枝起女楊瑤室幼慧父授以毛詩輒通曉大義遂能詩且工畫所居曰段莊就其景物為江村圖題詩其上以尺絹繡之詩字繪繡皆佳見者歎為四絕

莊盤珠

盤珠字蓮佩陽湖人關和女同邑吳軾室母夢珠而生故名之曰盤珠工倚聲幼穎慧好讀書女紅精巧然輒手一編不輟嘗從其兄芬佩受漢魏六朝唐人詩因倣為之輒工其詩多幽怨淒麗之作大抵似昌谷嘉慶間卒年二十有五

錢惠尊

惠尊字詵宜陽湖人陸繼輅室早喪母既嫁姑憐之時時節其動止之勞佚衣被之寒燠飲食之過不及而均之於是欣欣然始知有膝下之樂善為詩雖朝餐未炊秋風刺骨竈嫗謗鄰女訕譏猶復琅然長吟快然自喜繼輅

故貧惠尊自來歸數十年無幾微怨尤之意形於辭色蓋習聞富貴利達之不可求而文采傳世之爲無窮也

莊芬秀

芬秀字柔芝又字靜媛武進人適同里丁履恆端謹明慧大父存與學通古今每爲芬秀講說毛詩故訓及諸經大義輒有領悟故存與晨夕入內必呼至前口詔之又工繡文常刺素縑作大士麻姑像眉目衣褶如畫鍼黹外喜讀書暑甗得從嫂指授遂能詩有詩百餘首多沈苑之思

錢湘

湘字季蘋陽湖人同邑趙仁基室仁基故貧不恆其居出游輒數千里留或三四年湘居室之憂傷勤苦有仁基所不及知者澹泊無所歆羨而所遭困乏卒以損其年命道光二年卒年二十六錢氏諸女並讀書如男子子湘最慧所著樂府數十篇淒惋不可卒讀

湯瑤卿

瑤卿字口口陽湖人脩業女同邑張琦室幼知書能詩工繡事尤善翦綵能

於方寸地作山水樓閣人物魚蟲數十事意態如畫琦館穀所入先後支絀
瑤卿冬無棉衣朝夕不給率四女刺繡以易米恆不得飽至屑米爲粥日一
食焉迨琦官山東瑤卿往未數年卒於館陶署寢

呂福

福字清崑武進人星垣女適同邑陶善昌工詩沒後星垣爲之序而行之嘉
慶二十四年卒年三十

丁瑛輝

瑛輝字蘭裳武進人履恆女適同里吳自徵幼聰慧母莊氏博通史傳瑛輝
泥母求學母不之許戒之曰女子通文藝非福也迺潛詣塾旁聽諸兄讀聞
從問字學爲詩甚婉約適自徵後見吳家儉素恐以文字妨婦功輟弗講偶
觸發饒有姿韻暇與童媪談忠說孝及先世軼事性耐冷一月齋期過半曰
吾豈思成佛作祖耶求福田利益耶吾檢治吾心耳

張縉英

縉英字孟緹陽湖人琦女常熟吳廷鈺室詞筆秀逸真得碧山白雲之神多

疾病恆經月處牀褥益伏枕讀鏡臺妝匣枕衾之畔皆簡冊堆積至以爲常
嘗言讀書不得其解思之竟日夜倦極酣睡晨起輒能自解不自知其所由
病擷芳集收閨秀詩太濫正始集選閨秀詩太簡因另選一帙曰國朝列女
詩錄

張綳英

綳英字緯青陽湖人琦次女江陰章政平室工詩詞嘗曰凡讀詩則如身入
詩中爲詩則如心游身外身所未歷之境心能歷之言所未達之情心能會
之

張綸英

綸英字婉紉陽湖人琦三女同邑孫劫室工北朝體書日本高麗諸貢使輒
購其書以歸詩宗晉魏不屑爲綺麗之語一門風雅自成師友弟妹所生之
女皆受書於綸英各得其傳

張紉英

紉英字若綺陽湖人琦四女太倉王曦室早寡依弟以居張氏諸女名天下

而毓英尤工古文篆法

李紫畦

紫畦河南光山人陽湖張曜孫妾其父斌爲陽湖令司簽押文案攜紫畦僑居毗陵令罷去流落不得歸其母以兒紫畦體弱不任操作以張氏代有名德門多才媛遂鬻之年甫十七曜孫命女甥王澗香授之讀三年爲詩清婉可誦性和婉好文翰惜不永年

程蕙英

蕙英字苴儔武進人家貧常爲女塾師恃束脩以給薪米能詩

董琬貞

琬貞字雙湖號容壺陽湖人潮女孫同邑湯貞愍公貽汾室工詩畫尤善墨梅有小印曰生長蓉湖家漱湖

湯嘉名

嘉名字碧春武進人貽汾女詩詞秉父教花草得母傳工白描人物適王氏鶴舟太守子婦

金佩芬

佩芬字芷香錢塘人女史孫雲鶴女武進湯懋名室工白描士女

龔琴薇

琴薇字月鄰武進人能詩善寫生尤工畫蛺蝶

呂畹蘭

畹蘭字韻玉武進人喧亭女同邑謝榕室善丹青工詩

惲懷娥

懷娥字初蘭武進人源濬女淮揚觀察宛平曹恆室花卉精雅設色鮮潤一本家法繪桃子如生初夫恆任江浦知縣民饑饉懷娥出私囊以周不足民甚德之於是民間往往將所繪桃子供養於庭以尸祝云

惲懷英

懷英號蘭陵女史武進人源濬女呂光亨室花鳥雅秀尤善墨菊書法娟好夫歿京邸懷英撫孤寓居長安委巷鬻畫自給清節可風

劉琬懷

琬懷字撰芳一字韞如陽湖人汝器女嗣綰妹金壇虞朗峰室家有園栽紅藥數十叢臺榭參差闌干曲折與諸昆季姊妹聚集其間分題吟詠爲樂

呂承綺妹成婉

承綺字子奇陽湖人貽安女同邑湯成烈室妹成婉字子兌湯成烈繼室俱能詞

劉紫窗

紫窗佚其名武進人同邑管蘅若室耽詩年未四十而殞曾以傭繡資買唐詩作絕句云遲遲曉日度簾前堪笑年來此性偏滿院秋光渾不賞金鍼贏得買書錢

惲璠

璠武進人寫生得家法

惲珠

珠字星聯別字珍浦晚號蓉湖散人陽湖人毓秀女滿州廷璐室麟慶母十歲能詩十三工刺繡善畫筆意雅潔閨中有三絕之目道光間卒

陳素貞

素貞字幼秋嘉善人陽湖楊晉藩室工詞

呂采芝

采芝字壽華陽湖人子珏女同邑趙鏞謨室早孤育於叔父子班愛逾羣從相攸得鏞謨經年而寡鏞謨卒後無子女之遺乃抱子嗣宗冀其成立逮子生孫而子復夭亡其所歷有人世所難堪者素習倚聲精協律蒼涼悽厲之情一寓於詞

呂采芙

采芙字擷芬陽湖人子珏女吳縣蔣彬蔚室工詞

呂稠福

稠福字祐甫陽湖人子班女同邑趙鈞謨室善詩詞工楷法能爲擘窠大字鈞謨官廣東澄海知縣稠福因姑有足疾不能迎養遂留侍未幾鈞謨卒於任稠福隻身航海赴澄海扶柩歸葬咸豐庚申寇陷常州家室蕩盡奉姑攜子避居湘鄂間雖綦困處之泰然於侍姑訓子無不周至卒年五十有一

秦蘭生

蘭生江寧人武進費開綬室工詞

△徐文漪

文漪武進人星鈐孫女擅白描人物兼設色花卉蟲鳥惜不永年

陳蘊蓮

蘊蓮字慕青江陰人陽湖左晨室吟詠之暇爲花鳥寫生借晨遠宦津門以詩畫相切磨一時有趙管之譽津門地當畿輔閒官清况吏隱恆兼蘊蓮以詩畫易資硯田之潤轉勝於折腰五斗公卿延譽遐邇傳聞自臺省封圻以至僚友徵詩求畫紛至沓來口誦筆揮得瀟灑倜儻之概世所謂不櫛進士也

楊瑾華

瑾華字映蟾陽湖人晉藩女慈谿岑雲鶴室工詞

楊璿華

璿華字蘊萼陽湖人晉藩次女適宜興徐氏早寡事父母以孝稱能詩詞兼

好篆隸

左錫蕙

錫蕙字畹香陽湖人歸安姚開元室工人物花卉均超妙入神

左錫璇

錫璇字小桐號芙江陽湖人昂女同邑袁績懋室工書嫻繪事花卉竹石秀逸有致與績懋琴鳴瑟應致相得也績懋在閩殉粵匪難故鄉又經賊燬錫璇寓閩中拮据支持其遇有甚難堪者而茹荼集蓼中未嘗廢筆墨也

左錫嘉

錫嘉字小雲號浣芬又號冰如陽湖人昂三女華陽曾詠室畫宗甌香館沒骨法設色鮮麗筆力遒勁能自成一家不落恆逕詩多幽憤感慨之語蓋處境使然渾厚處直逼漢魏

陸 蓓

蓓字芝仙陽湖人同邑謝俊士室工詩詞事親至孝于歸後伉儷敦篤相敬如賓既其夫沉湎於酒漸至狂感爲讒言所中蓓乃長齋奉母口不言文居

三載髮匪陷毗陵豔其色欲犯之蒨厲聲大罵匪怒刺以矛罵愈甚大怒叢刃刺之至死罵不絕諺謂女子無才便是福是未可論於蒨也蒨既有其才兼具其貌卒戴此大福以終爲門戶光信乎才之不可已也

方蔭華

蔭華字季嫻武進人同邑趙仁基繼室通經史兼善繪事與仁基唱和

丁靜蘭

靜蘭陽湖人承衍女同邑趙承穀聘室咸豐十年粵賊陷常州有絕命詞

沈珂

珂字雲浦江陰人耀均女武進黃曾慰室工詩善畫

湯湘芷

湘芷字佩芬陽湖人工詞

許嘉儀

嘉儀字仙圃華亭人陽湖湯春舫室工詞善書書學顏魯公

陳端穎

端穎字蘊吟一字小芝昭文人武進高耕書室夫歿守節欽旌節烈幼貞婉讀書通大義能詩詞善琴工繪事

程浣青

浣青佚其名武進人汪濶亭室工詩詞五七言古境界清絕詞則高陽臺二闋直使斷腸漱玉不得專美於前

陸恆

恆字衛卿武進人循應女同邑劉灝室工詞

陸蓉佩

蓉佩湯湖人鼎晉女同邑趙念植聘妻幼聰穎讀書卽通大義比長學爲詩詞與兄爾熙太史唱和無虛日所造益深沈摯悱惻見者不知爲女子作也年十七念植以瘵疾亡奔喪成服哭泣如禮甚得舅姑歡心喜佛法博觀內典研究不倦遇有心得作偈語妙達禪理多前人所未道者有某氏婦不得於姑來泣訴作禽語一章示之其人感悟卒以孝聞咸豐十年粵逆陷常州郡城隨父母轉輾遷徙最後寓如皋曾粥幾不繼時爾熙應禮部試於京師

蓉佩急盼一捷以慰庭闈速爾熙成進士而蓉佩疾大作屈指望爾熙聞歸風聲則曰行人至耶卒後入日而爾熙至撫棺大慟曰失吾妹是吾失畏友也妹死吾學勤者誰乎吾過規者誰乎作輓詩數章示人人不忍卒讀

伍宗儀

宗儀字蘭儀陽湖人贊易女適宜興陸氏毗陵閨秀倚聲辨香秋水軒爲多宗儀尤酷嗜者也

黃馥

馥字幼芳武進人曾慰女江陰金武祥室母沈氏工詩詞兼善繪事馥秉承母教好爲韻語

唐韞貞

韞貞字佩蘅武進人與忠女同邑董介貴室善詞

王采蘩

采蘩字管香魏驥妻師事從母張綸英能詩文

孫嗣徽

嗣徽字少婉原名采藍呂懋榮妻本姓王從母張綸英撫爲女綸英適孫劼故嗣徽姓孫氏從綸英學詩清曠絕俗書傳母氏家法畫學惓清於

王采藻

采藻字綺香呂懋榮繼妻受業於舅氏張曜孫詩畫與嗣徽相埒

言雅

雅字韻清陽湖人啓方女適巢氏雅詩格清雅流利逼近晚唐偶作小札有黃初諸子之風天姿敏慧復得家學淵源所適巢農家子也又於咸豐庚申遭髮匪之亂遇害憂傷憔悴風雨幽窗益自傷悼嘗曰吾之摧殘狼藉而死者竊慕太史公所云慮歿世而文不見於後世耳

何緯

緯號織影老人武進人趙振裡室通經史工詩書畫師文徵明晚歲以畫自給

錢希

希幼名應貞字夢龜陽湖人嚮果女同邑蔣南棠繼室學詩勇猛新意間作

有才女名性誠篤庚子歲末南棠病自楚歸一夕卒希不食數日思自縊不得癸卯一子細樹七歲又以急驚死希益不欲生遂吞藤黃無算大吐泄竟不死得道家金仙證論書言鍊氣過關之法自謂能之學一月幾死既而中夜獨自與人問答晝輒閉目堅坐人與論理如中木石出語病顛性情全變非學詩清高時矣往往發憤切齒聒聒不已至母亦憾之行路帶刀箭親戚攢眉蓋從古才賢婦女其遇未有若希之窮者也節孝孤貧世多有性情自在也希靈明喪失取人憎惡雖處天之下地之上不復爲日月光明所照不大可哀耶非從古才賢婦人未有之厄耶

謝岱

岱字璞雲武進人鍾英三女幼穎悟讀書過目成誦光緒季年京師創設女子師範學校岱以上海務本女塾高才生被選入校肄業長於地理算術圖畫三科常以最優等列前茅派充附屬小學首席教員管教有方成績優異孝欽太后聞之召入宮面試賞賚圖書筆墨多種溫諭慰勉毗陵女士以學行名聞於朝者岱蓋其首也辛亥革新校務停頓以護送同學南歸染肺病

民國二年卒年二十有七

△趙貞懿

貞懿字孟堅武進人幼讀書識義理咸豐庚申間轉徙避兵未嘗廢學年二十來歸同邑王復旦仲明未久復旦卒遺孤子二女一長子理冕年甫四歲次子理中生僅三十六日因亂家貧復遭大故上侍邁姑下撫諸孤井臼浣濯老幼衣履均貞懿一身任之姑有疾侍養盡孝二子就外傅以女紅易紙墨午夜一燈課子讀久而不倦理冕穎悟年十六遽歿於疫貞懿益悲痛理中年長繼業鹽務事業發展能以甘旨養母而貞懿素食勤苦如故見孤寡貧而無告者矜恤恐後理中慷慨任俠勇於爲善蓋本之母教也不幸理中先其母十有三年而卒有孫春渠能卓然自立貞懿顧而樂之勤苦一生晚年神明強固可見天之報施善人爲不爽也於庚午歲六月壽終春秋八十有三鄉人官京師者以貞懿之行狀聞於當事褒獎如例崇祀邑之節孝祠

△朱韻藻

韻藻字蘭修晚年信佛法名觀誠武進人莊孝廉清華之繼配也幼入塾資

質殊鈍洎長記問過人凡所經歷越數十稔猶能強識不忘諳藥性兼善相人然未嘗讀神農本草與麻衣柳莊諸書而偶爲人擬一方服之輒效治小兒病尤能洞見癥結斷人休咎往往談言微中戚族中有就問者謂某行某運不吉事後皆有奇驗不知其果操何術也年二十七歸於莊氏撫前室兩子若已出娣姒間翕然無閒言時清華以授讀自給旋捷北闈而家仍寒素每有緩急韻藻恆出贈嫁資以濟之清華於役晉魯韻藻靡役不從辛亥國變晉中倣擾清華身兼五職羈留省垣家事無鉅細一以委之韻藻中間曾避地至榆次之東聶村蘇家莊朋好眷屬咸來寄居有不先咨謀而至者韻藻殷勤款接無少倦怠清華爲人長厚遇重大事多由韻藻相助爲理生平操作過勞輒發肝胃氣恆自隱秘不言晚得喘疾遇寒輒發丙寅七月隨清華自蘇抵滬猶與諸親舊閒話午後忽大吐因就榻小睡溘然而逝年六十有二

△任玄珠

玄珠字孟潔宜興人適武進劉樸幼聰穎八歲能作家書其爲婦奉上相夫

極其孝敬樸作宰於粵嘗隨至廣寧任所廣寧之設師範傳習所建公共圖書館玄珠實爲之規畫其教子女能審度才性而命之學二子一女皆克有成處已約待人厚親故有緩急必得所欲以去讀書務通大義好史記通鑑李白之詩姜夔之詞晚好周秦諸子尤篤嗜老莊常州有粹化女學經費不支玄珠寶任監督謀咨於衆與爭存女學合併更名粹存苦心維持三年嗣以夫喪辭去民國元年改爲武進縣立女子師範玄珠復膺聘爲監學逾年任校長以所得俸還學校又不居捐助之名感化所及教員勉勵學生翕服復節省不急之費營構堂宇凡任校長六載校譽大著其子旭服官廣西迎養至任遂辭職十年女師範有易長風潮鄉人士議請玄珠復職玄珠還至上海卽赴寧見當局謀所以息爭者亦以不久留不取俸告鄉人校事安謐卽潔身而退以民國十三年十一月病卒於蘇州春秋六十有五

△沈韻繫

韻繫字季齋原籍江陰後遷武進錢以振之室也父保靖歷任江西臬司福建藩司治家極嚴對子女不稍假辭色獨鍾愛韻繫韻繫亦婉愉承志能盡

孝道晨夕侍奉兼爲料量書札翰墨年十九于歸錢氏上侍翁姑下撫兒女
孝慈兼盡稱爲賢婦錢宅有半園頗饒花木韻縈於家務之暇輒隨其夫玩
花賞月烹香茗攜淡芭菰下棋亭中以爲樂旁人視之不啻神仙眷屬也相
夫治家深明大義教子女極嚴嘗曰父母溺愛其子無益有害必使其習苦
耐勞方能自立紈袴子弟一物不知一事不能爲終至墮落者父母之過也
故絕不爲姑息之愛又云一家之盛衰子孫之賢否均惟主婦是賴女子必
須養成勤儉習慣故對其女管教尤嚴某年父患沉疴韻縈方在產褥家人
匿不使聞及彌月方告之韻縈惶急萬狀因念古人有割股療親之事夜半
卽夢見一女子青色衣裙授以紅籐利剪告之曰汝果能割股父病必愈且
得延壽十年遽然而覺天甫黎明卽著衣起至別室啓抽屜夢中所見利剪
赫然在焉遂剪臂肉裹以紙攜之歸甯私自投入藥劑服後父病旋愈果後
十年而卒韻縈年五十後患心臟病日益重致臥牀不能興二十六年中日
戰爭延及常州家人以病牀昇之避難於馬蹟山及山中兵匪擾亂不甯厥
居乃乘舟間關至海上遭此播遷病乃不起於民國二十九年四月卒於滬

春秋六十有五

△劉 箕

箕字湘明又字可青武進人幼孤既無伯叔終鮮兄弟惟有姊一人年十二卽習繪事工仕女迄十五齡已能鬻畫養母事事先意承志母亦視如掌上珠當時女子之能書畫者絕少箕藝事既精貌亦端麗名動一時及長歸同邑程涓其始伉儷甚篤旋因程有他遇遂致仳離綠衣終風意頗鬱鬱疾病乘之偶一用腦卽眩暈失眠以故年未四十已不復從事丹青矣生平待人接物出於至誠凡與爲友者莫不感其用情之摯德行之高晚歲處境艱困貧病交并民國三十三年甲申二月忽患中風不能語遂歿於滬壽八十

△呂景蕙

景蕙字若蘇又號璇友陽湖人景端之妹性亢爽嗜學年十五卽善詩文偶有所作輒爲士林傳誦年二十四適同里趙茗卿爲室事姑婉婉順從言動中禮內外無違言邑中興辦女校聘景蕙爲教師訓導有方多所成就後隨兄嫂旅居滬上亦設帳授徒藉謀升斗一生境遇多處拂逆然日手一編志

潔氣愉時時流露於詩文有感懷之意無噍殺之音年五十一病卒遺稿有
紉佩軒詩詞草行世

△呂鳳

鳳字桐花武進人適同邑趙劍秋有才女名工篆書兼擅繪事尤工倚聲爲
詞家所推服稱桐花夫人閨房唱和之作咸擬諸松雪仲姬以民國二十二
年卒於北京有清聲閣詞四卷行世

△費湘

湘字楞仙武進孟河人名醫費伯雄之孫錢鏐之室也父應蘭工詞翰善畫
山水花鳥湘得其傳年二十二歸鏐鏐父雲瞻好行善事湘能先意承志竭
所有以佐之鏐官兩省宰大邑襄理內政力持大體性儉約子女衣着一袴
補綴至數十處常云小兒女須爲積福惜物力且杜其驕奢之念錢氏於兵
燹後子弟多廢讀因傾所積與變易簪珥集兩千金捐入宗祠資膏火光緒
二十四年病歿年四十有七彌留猶詔諸子方琦方度方軾曰汝等他日能
成立再集數千金立一家塾以成吾志吾瞑目矣

△劉佩纒

佩纒武進人允中之女錢方琦之繼室也能詩通音律長考訂輯侯國僭都輯略一卷隨園詩話削繁十二卷方琦觸時疫歿佩纒同日以身殉年二十有九

△莊曜孚

曜孚字苴史別號六梅室主人武進人仲求第三女思潛思緘之妹幼習畫於袁毓卿女史工花鳥長適衡山陳季略韜陳精鑑賞富收藏以是曜孚畫益進季略官於蜀同入川十餘年鼎革後歸里鬻畫旋入都求者益夥門弟子亦甚衆丁丑夏季略歿於秣陵曜孚率其子扶病避兵入蜀次年亦歿年六十有九

△陳警

警字覺孺武進人五歲失怙六齡入塾穎悟過人嗣以他故輟學年十一丁嫡母憂雖在髫年而哀痛無異成人偶習女紅亦臻精妙以少而失學恆引爲大戚且鑒於世界潮流男女並重久欲負笈出游徒以見阻家族未償厥

志乃於光緒三十二年春與女友某某偕赴上海入宗孟女學肄業僅月餘爲家人強迫而返後歸同邑莊先識爲繼室先識與同志創辦粹化女學警卽入校聽講體故荏弱旣生女潔而一病幾殆久之始愈以蒙養爲教育初基復往杭州入浙省女子師範學堂習保姆學以最優等畢業歸後於戊申八月初等小學爲蒙養生畢業之升階粹化女學改爲武進縣立女子師範學校警兼任附屬小學教科服務於蒙養院八年卒以貲力俱竭停罷人咸惜之警擅辯才清之季世滬杭甬鐵路廢約議起蘇路收回自辦時有倡爲女界保路會者警亦奔走其間不憚口舌之勞共盡勸募之責辛壬改革之際政黨蠱起集會自由警雖未掛名黨籍時登演壇發爲弘論聞者動容其他若勸助軍餉籌募振捐親率蒙養院生徒售物於會所獻藝於劇場者非止一次其盡力社會有足多者警至性過人奉母至孝又篤於手足之誼性坦直外和而內介屢遭拂逆遂以損年以民國九年三月病歿年僅三十有七